

115 年基隆市語文競賽臺灣客語朗讀文章社會組（四縣腔）

編號 1 號

【遊寮日本合掌村】徐姿華原作

避暑放寮，偕同屋下人去日本，想去看該世界文化遺產——合掌村。

對機場坐遊覽車出發，熱情个後生導遊啖無停，一下仔講風土人情、一下仔講歷史傳說，大家做下當幫襯、笑到掙肚屎；毋過，偕還較中意窗門外，一路倒退个青山綠水同日式建築。該兜鄉下人屋个細庭園，會有修剪到當亮線个松樹同開到鬧鬧个花草，街市人家也會有幾盆仔色目打眼个草花擺在屋面前，襯等該淨俐个屋舍，一種幽雅恬靜對目珠流入心肝肚漫開來，變做一窟涼水，同熱天个煩躁隔開，分人感受著清心同舒爽。

第二日，八點空仔日頭就十分晟眼，對高山市轉入彎幹个山路，偕兜愛去合掌村。車窗外背日頭个光影分大樹蔭忒，一下光一下暗，一半下日頭絲對樹葉縫箭出來，該金晶積亮¹就像舞臺燈光樣仔；山路頂个原始森林、淨俐个坑水同石壁，該兜浸青、翠綠同吾疲勞个目珠也洗到淨淨。

在山圍肚个合掌村到地，該賁賁像人雙手合掌个三角形青茅

稈屋頂，就係分人安名个緣由。這「合掌造」个建築設計，就係為著屋頂愛做得承受寒天落雪个重量，莫分大雪砒壞忒，正設計做斜 60 度个屋頂。屋肚个桁桷、楯仔做下用樁頭固定，無用半支鐵釘仔，十分柱固耐用，實在當有智慧又環保。

在莊肚漫步，看著屋脣有大水車定定仔打水，一條清淨見底个圳溝流過莊頭，幾下尾大嫫尾个鱒魚緩緩仔蹣尾、自在泅水；幾坵青荷荷个禾田，田水還略略映等天光雲影，咖啡色个合掌屋脣淙黃、水紅、雪白、淡紫，各色各樣个花開到鬧借借仔，蜂仔、蝶仔、揚尾仔、花蚱仔飛來飛去；在這位，時間像頓腳哩，日頭也變溫柔，恬風息氣，連四四散个遊客也像係這靚靚仙境个一部分。

熱天時節个雨講落就落，一陣人分雨逐到龍頂个天守閣寄雨，順續啖一杯咖啡。過一下仔雨落煞、天開地，偕兜對觀景臺看往下，歸個莊頭顯在眼前，遠遠，濛沙對山窩浮起來，分雨洗過个合掌村，分藍天、白雲、青山、濛沙圍等，正經係一幅盡靚个畫。

在合掌村寮一日，該種鬆爽、平靜、安然自在，較贏過麼个！若講日本个合掌村係現代桃花源，一息都毋會差！

¹ 金晶積亮：音 gim' jia' jid' lang；光耀明亮的樣子。

115 年基隆市語文競賽臺灣客語朗讀文章社會組（四縣腔）

編號 2 號

【講，客家菜肚个酸】許倩雯原作

一講著「酸」，舌嫲底个口涎水就密密流出來。當多人佬著客家菜个標準口味係鹹、油、香，其實客家料理个酸味，恬靜篤實个因在生活肚。一方水土養一方人，精食个客家人同酸个滋味入菜，化做千姿百樣。

「發」係做酸當基礎个方式。筍乾特別个香氣合有一種略略仔个酸，用肥湯炆過，牙齒咬斷筍乾纖維¹該央時，酸酸个筍味²乜跔等肥湯流入嘴肚。該種酸香，係用日頭同時光保存下來个味緒。寒天大出个芥菜，放入醃缸經過時間去發，轉黃出味。鹹菜拿來蒸肉圓、煲爌肉、炒麵腸……，不論係齋菜抑係葷菜，都當合味。客家人講「鹹菜型个人」，就係講這儕人同麼人都攞得。

桔醬个酸，係果子天然个酸味。一入嘴就會害人牙研目皺个酸桔，無辦法準水果來食。加兜仔糖、鹽同辣椒仔，煮做醬，就異好落嘴。甜酸中帶一息仔苦辣个滋味，拿來搵煤過个三層肉，毋單淨解忒豬肉个臊味同肥膩，還加添了清香。簡單个料理變做

無簡單，分人食咁還會尋味。

「琢琢琢琢……。」切薑嫲个聲同佢錫入灶下，「豬腸炒薑絲」應該係客家菜肚盡出名个酸咧！豬腸加酸醋，用大火炒到酸丟丟仔，嘴甘食著，鼻公就搶先鼻著哩！成時承牙个大腸分人挾到淨淨，一息仔薑嫲傍飯，酸溜衝鼻个滋味，也當扯飯。

客家个四炆四炒，也有不少帶酸味个料理。刷一頭豬仔，腹內也愛好好利用。一品炒菜「鹹酸甜」，就係用黃梨个酸甜同豬肺个臊味化忒，變成做得出菜个好料理。另一品炆菜「福菜炆豬肚」，煲出來个湯酸甘酸甘，舀一勺攪飯，兩下半就划到飯碗見底。

食酸，對身體一好。根據醫學研究，「酸」除忒開胃清肺，還做得抗氧化。在客家人食个文化肚，因咧當多智慧。客家老祖先咬薑啜醋，行過艱苦辛酸，用心同生活過到甘甜甘甜。

¹ 纖維：音 xiam' vi'；纖維，由連續或不連續的細絲組成的物質。

² 味：音 mi；湯汁。

115 年基隆市語文競賽臺灣客語朗讀文章社會組（四縣腔）

編號 3 號

【同靚靚个春天相堵頭】江文怡原作

屋背有一隻大體三、四坪大个庭園，用鐵柵仔同門背个人行道隔開來。建築商起屋該下，留一搭地做花圃，種咧一頭小葉欖仁樹。入屋定貼過後，利用放寮日，偌兩公婆同花圃地泥頂个雜草梆梆忒，陸陸續續種咁一頭櫻花、三頭桂花同幾頭仔鳶尾花¹，花圃看起來正較有生機。這下，逐年來到春天个時節，庭園就會變到鬧熱煎煎。

初下碼，種有二十零年，生到兩棧樓恁高个櫻花樹開始暴花，水紅色細細菁菁个櫻花，這一蕊，該一蕊，漸漸仔撈撈開唸樹杪。櫻花錫來一群群即靈个青鸝仔同好搞个白頭公仔，唧唧啾啾、跳上跳下，佢兜成時企在樹頂高看風景、打嘴鼓；有時節鑽入樹仔裡肚食點心、搞园人尋，還不時湊煞猛个蜂仔同揚蝶仔，共下來花樹裡肚搞寮、啖花蜜……，青鸝仔還會在樹杪頂做竇，櫻花樹嘎變成佢兜快樂个遊樂園。過路个人下把仔也會頓腳、頭臥臥仔緊看這頭靚靚榮榮个櫻花樹，感受著春天難得个美景。

續等，櫻花樹下清新幽雅个鳶尾花，一年過忒一年，從一頭

一頭仔遶到一墩一墩仔²，看著厥細細長長个葉尾綻出花苞，該下，花仙子差毋多就會來報到哩。暗晡頭係看著葉尾个花苞白白、澄澄，像一粒粒仔个細電火珠仔，就係佢兜既經做好準備，預約隔日會開當多、當靚花蕾个暗號。出日頭个時節，佢兜就會恬恬仔、偷偷仔來開花，像一群頭那戴等金色皇冠，著等吊菜色彩、白色紗裙跳舞个人，在春頭个微風裡肚，歡喜个跳舞，放送淡淡个花香，貼貼³到日頭落山，佢兜正恬恬仔、偷偷仔離開。這春天限定个美景嘎帶分佢快樂个心情，乜留下難忘个畫面。

神奇个四季，總係在這隻庭園毋多知仔轉換。三、四月間，雖然天時還多少仔清冷，毋過庭園裡肚當開个櫻花同鳶尾花，嘎恬恬仔帶來咧春天个信息，這央時个鳥語花香分人心情鬆爽，就恁樣，年視年偌同這靚靚个春天，在這隻庭園相堵頭。

¹ 鳶尾花：音 ien' mi' fa'；鳶尾花，開花植物，屬於鳶尾科。

² 一墩一墩仔：音 id' dun' id' dun' e'；一叢一叢的。

³ 貼貼：音 dab' dab'；一直到。

115 年基隆市語文競賽臺灣客語朗讀文章社會組（四縣腔）

編號 4 號

【尋味】劉懿玲原作

在吾心肝肚有一種想念个味緒，就係該板皮軟抔軟抔、料頭炒到噴香个豬籠板，分人想著斯口涎水落落跌。為著同這味緒尋轉來，見擺看著有賣豬籠板，定著愛買一坭來食看啊，毋過食過千家百家，還係試著頭擺阿姆做个豬籠板最好食。

還細時節，因爭屋下單淨阿爸一儕賺錢畜歸屋下人，還有偌同老弟、老妹讀書愛所費，阿爸个月給實在毋罈用，故所有一站仔阿姆會在屋下做豬籠板，再分阿爸拿去夜市頂賣。用恁樣个方式來賺外水，屋下个生活正有好較豐湧兜仔。

自阿姆開始做豬籠板，逐日就無閒泊杈，不管係做板進前个準備、做板過程中个事頭，項項就愛阿姆來打理。平常日時頭阿爸同偌兜細人仔愛上班、讀書，伸阿姆一儕人，打早愛去市場買材料，一轉到屋就開始做板皮、炒料頭、蒸板仔，完日仔就在灶下捩捩轉，無一時間。到臨暗仔阿爸同這兜正做啊好个豬籠板拿去夜市賣，阿姆正做得歇睏。看著佢恁操勞，偌同老弟、老妹放學轉來同放寮日乜會同佢搵手。

因為輒常跔在阿姆尸背尾做厥灶下个助理，正知做豬籠板實

在無恁該，若係愛做出傳統豬籠板个味緒定著愛照步行，人講：「甘蔗食了一目正一目」，一步一步來毋好潦草、取遽，係無就做毋出一等好食个板。毋單止恁樣，還有當多微毛末節愛注意，比論講破米个比例、炒料仔个順序，逐樣就愛靠經驗正會成功。好在阿姆自細就對阿婆該片學得好手藝，逐日臨暗邊仔正做得出一隻隻分人食起來會尋味个豬籠板。打幫屋下愛做豬籠板个生理，分偌這兜圖食个細姪仔逐日都有「試食」个機會，見擺食著正蒸啊好个豬籠板，就試著還幸福啊！

做麼个試著該央時阿姆做个豬籠板最好食，因為每一隻豬籠板裡肚有阿姆个辛勞汗水、對細人仔个痛惜、對家庭个付出，還有歸家人个團結合作，這就係豬籠板好食个源頭，係用錢買就買毋著个啊！

今這下，阿姆年紀大咁，無法度過做板仔，毋過還細時節豬籠板个味緒還係在吾腦膈肚。想愛食著這好味緒正經懶尸毋得，這下換偌對阿姆身頂學手藝，偌兩子哀定著愛同佢傳承下去！

115 年基隆市語文競賽臺灣客語朗讀文章社會組（四縣腔）

編號 5 號

【斜張橋】王怡方原作

細細時節，正月初一過忒，阿爸會湊一大屋下人共下去佛光山看花燈。聽著愛去看花燈，心肝肚恸，一路搖來搖去看風景既經盡錫人，對佢兜細人仔來講，做得出門遠寮係最暢个大事啊！

對屏東駛車仔出發行過高屏溪个里嶺大橋，過橋了後隨沿山路行，佢个目珠擘金金，這片看、該片看，車肚裡背，阿爸同阿姆打嘴鼓个聲，係佢這擺旅行最好聽个廣播電臺。忽然間，佢看等頭前个景象，問講：「該片高高个青山，仰會有恁高又恁長个路？」阿姆笑等講：「該係南二高，高速公路愛來到屏東哩啲！另擺屏東个交通會還較利便，高高个紅毛泥樁，係橋墩，橋愛通過高屏溪，係一隻無簡單个工程哦！」

時間日日過，南二高總算完成。遠遠看過去，高屏溪俾兼高雄該片有兩支墩仔，斜斜行往上到天頂，最尾接等變做一支紅毛泥墩，變成英文字型倒「Y」，橋身拉起一條又一條纏綿繃仔个紅色鋼索，接到紅毛泥墩頂，壯觀个景象，變成有名个界線地標——斜張橋。頭擺看等半天高个橋，感覺有一種魔力，對屏東通過，佢像離寶个鳥仔，想愛遽遽飛去天頂，享受青春人生，外背

花花世界隨佢自由飛，讀大學、研究所，到出社會，多姿多彩个生活，同恬靜个故鄉無共樣。一矚目二十零年過忒，斜張橋還係有一種魔力，對高雄通過，故鄉闊野野个田就在頭前，佢个屋下就會到咧！

現下个佢，就像飛恹个鳥仔，想愛尋轉鳥寶歇睏。逐擺駛車仔看著頭前个橋，目汁強強忍毋核跌下來，原來這就係對家鄉个思念，總愛經過歲月風霜正會知。家鄉有佢熟事个鄉土味緒，有爺哀溫暖包容个雙手，像斜張橋，永遠穩穩企在該，等佢轉來。

「阿爸、阿姆，過斜張橋哩啲！屋下會到咧！」「好哦！這擺个旅行盡好，恁俚當歡喜。」這下，佢感覺最幸福个一件事情，就係爺哀身體康健，做得渡佢兜駛過斜張橋，去各地遶山花。看著爺哀歡頭笑面，在車肚繼續打嘴鼓做廣播，再過共下轉到屋下，這種滿足，就係最簡單个幸福。

斜張橋毋止係連結高雄同屏東个地標，還較係佢對家鄉、對屋下人最深个依戀。

115 年基隆市語文競賽臺灣客語朗讀文章社會組（四縣腔）

編號 6 號

【泡泡龍出頭天】李秀鳳原作

泡泡龍毋係得人惜个人公仔，係一種當得人驚个病症——遺傳性表皮分解性水皰症。著病个人因為基因个因由，歸圓身个皮膚、黏膜，小可受著刺激就會有水膘仔走出來，故所正有「泡泡龍」這隻偏名。聽講，一百萬個嬰兒仔裡肚，就有二十個會著著這種罕見个遺傳病。

今年三十三歲个阿鈞，從細就係泡泡龍，身項輒常有傷口、水膘以外，連喉嚨頭、目珠肚个黏膜也會裂開來，痛到佢噉噉滾。佢九個月大个時節，因為右眼緊爛皮，爺哀摘去分先生看，用紗布包個零月過後，右片目珠嘎看毋著咁，左片目珠又來弱視。

阿鈞逐日愛同日頭搞园人尋，驚跌著、驚分人踩著、還較驚分人撞著，去學校讀書，從來毋識上過體育課。雖然恁細義，佢還係歸身擲皮扯痢¹，爛疤仔又痛又癢，艱苦到睡毋落覺。

阿鈞五歲大个時節，有一日，厥姆發現佢畫圖當專心，手毋會去抓疤。人講：「閒手爪爛疤，緊爪緊大疤。」為著毋分妹仔

个手閒下來，做阿姆儕當鼓勵佢畫圖。坐在壁角恬恬畫圖，係阿鈞試著最快樂个事情，因為佢會毋記得傷口个痛、結痢个癢。

讀高中開始學水墨畫，佢有盡多个作品，連續得著國內外个大獎，其中有一幅畫安到「生命个裂縫」，毋單淨色目豐富，筆法也當幼秀。圖畫裡肚，大樹花刺必駁个樹皮，像泡泡龍結痢个皮膚；樹頂寄生个植物，像在乾燥又變形个皮膚頂，開出一蕊一蕊亮線个花；深深个樹窟窿，企等一條白色个梅花鹿，係保護自家个精靈。

阿鈞講：「生命裡肚个逐條裂縫，都係行向新世界个窗門。」阿鈞讀高中、研究所个時節，得著兩擺總統教育獎；113年又得著全國十大傑出女青年个榮譽。「忍得打在礁石頂个痛苦，正做得激出靚靚个浪花。」阿鈞希望自家个生命經驗，做得幫助還較多同佢共樣个泡泡龍企起來、行出來。

阿鈞係生命个勇者，佢係吾个外甥女。

¹ 擲皮扯痢：音 bang' pi' ca' lad'；形容皮膚緊縮撕裂傷口的樣子。

【少忒手機仔个日仔】張美容原作

你識想過，這下係無網路、無手機仔个日仔愛仰般過無？當慣戰¹用手机仔个佬，一直到有一擺歸十日無手機仔好用，一隻心無落無著，正知無手機仔个日仔艱苦過。恁多年來，看手機仔係个精神食糧，無手機仔比無飯食還較難耐。

自從有智慧型手機仔以後，佬做麼个事情都倚恃佢，逐朝晨愛佢喊佬跣床，再過看有兄弟姊妹無就好朋友个問安愛回無？續等看有人連絡佬無？有麼个國內外新聞愛關心無？做這兜事情，像一種儀式樣仔，逐日都愛做一遍。除忒恁樣，下把、下把仔還愛拿出手機仔來看一下，驚怕有麼个消息漏忒。到暗晡頭睡目，還同手機仔放在枕頭脣，反躁無就半夜睡醒時節，習慣在枕頭脣罅罅啊，尋手機仔陪佬渡過這漫漫長夜。還慘哦！佬願手機仔嗶像嬰兒仔願乳樣仔，離毋開也戒毋忒，仰般這下會分手機仔支配佬个生活，佬變成手機仔个奴才咧。

該無手機仔好用个暗晡，星光半夜地，一儕人還在眠床頂翻來眨去，佬想毋解，像佬恁樣个年紀，哪種日仔無過過。細細到

大無冰箱、無電視、無冷氣、無電話、無手機仔這兜，還毋係照常快快樂樂大。佬試恁看啊，頭擺無手機仔、無網路个日仔佬係仰般過个？係咧，看小說啊！跔等鍾梅英个《海天遊蹤》在瑞士湖脣「毋知今夕何夕」，也分金庸小說肚个「為國為民，俠之大者」感動，還輒常為賈寶玉同林黛玉²个運命流目汁。小說一本看過一本，佬日日對現代同古時个歲月中穿梭，乜時時對國內同國外之間來回。無手機仔个日仔乜過到精彩、逍遙！該時朋友之間个聯絡，依賴用手寫信仔，有溫度、有感情，見擺在送信仔个手頂接過信仔个時節，該種快樂，毋係現下用手机仔傳訊息做得比个。

十日過去地，手機仔做得拿轉來咧，拿著該下，佬一分鐘都無停跔，煞煞打開來，一則一則堆山寨海个訊息，一個一個等等佬个朋友，做下係佬个掛吊。這下佬扼等手機仔，就像扼等全世界樣仔，恁充實、恁滿足，手機仔又變成當重要。

佬懷念無手機仔時節安然自在个暗晡，乜想愛享受手機仔帶分佬利便个生活。唉！實在無結煞，佬嗶毋知愛仰般選擇！

¹ 慣戰：音 guan zan；習慣。

² 林黛玉：音 lim y dai ngiug；林黛玉，古典名著《紅樓夢》的女主角之一。

115 年基隆市語文競賽臺灣客語朗讀文章社會組（四縣腔）

編號 8 號

【歸來歸來】巫良國原作

歸來，係佢个家鄉，乜係一個因在吾心肝肚个記憶，一個想愛轉去个地方。大學時節離開家鄉去臺北讀書，畢業過後就留在臺北教書。北漂生活二十零年，毋單淨朋友，連佢自家乜試著怕會在這落地生根，變臺北人吔。

一直到有一日，聽著彭佳慧小姐兩姊妹唱个〈歸來〉這首歌仔，看著影片裡背熟事个面帕飯店、廟坪，嘎同因在吾心肝肚个記憶帶出來吔。時間正式就像吊晃槓仔，經過二十個秋冬，臺北再過好，總還係會想念家鄉。逐擺棄日轉到南部雖然還愛用網路來報路，毋過，心肝肚三不時就會有一個聲音走出來：「逐擺放棄就同大家人尖人轉屋下个日仔，敢還愛繼續？」

「輕輕唱一首歌仔，送分離家个朋友添燒暖。」這個燒暖个感覺，有阿爸目望望仔个期待、有佢深深个想念……。該日，共樣坐等火車，轉到屏東个時節，傳來熟事个廣播聲：「屏東站到吔，愛下車个旅客請準備，下一站『歸來』。」歸來，佢个家鄉啊！這位正係佢燒暖个屋下，落葉歸根个所在！

決心愛調轉南部吔，毋過，進前同事申請調轉家鄉時，一擺

又一擺个失望同打擊，這下嘎分佢實實在在體驗著這種心情。人講：「無期待就無傷害」，但係，仰會無期待呢？心情變到無安無樂，尾項將就去跌筊仔問神，好得係好籤。毋過，還係心神毋在，就驚怕毋知會變卦無？就拜託朋友掄算塔羅牌，七張牌一掀啊開來，「今年一定愛申請」个話對吾耳公傳入心肚，朋友還三交代四吩咐講到一焮鑲个注意事情。

等待當中又望又驚。到調動結果公告出來——成事吔，佢嘎分自家个目汁嚇著，原來「歸南、歸鄉」係吾心肝肚因到微微¹个夢想。

轉來過後這恁多年，騎等奧多拜在高屏大橋頂頂來來去去，看該橋底下个河壩跔等四季有無共樣个景象，鼻該禾田頂濫泥个香味、化學工廠个廢氣、畜豬仔人家个豬屎味，毋過，這兜味緒嘎合等²童年回憶，變做一種親切又想念个情感。時間就像吊晃槓仔，經過幾多秋冬，臺北吶過³好，想念个總係家鄉。到中年做得聽著這首〈歸來〉，乜係一種赴得掣个幸福。

¹ 因到微微：音 kong do mi' mi'；藏得很隱密。

² 合等：音 gab`den`；和著。

³ 吶過：音 ang go；再。表示動作繼續重複。

115 年基隆市語文競賽臺灣客語朗讀文章社會組（四縣腔）

編號 9 號

【十六份車頭¹】羅寶貴原作

秋尾到冬下頭該一駁仔，日頭花柔柔仔照、風輕輕仔吹，雙十二這日天時當好，正經係出門遶寮个好日腳，愛去哪寮正好呢？心肝頭忽然間浮現——十六份車頭。

這隻老車頭，係苗栗縣三義鄉勝興村个古蹟，佢係頭擺臺灣西片，海拔盡高个車頭，乜係沿路光景盡特別个一截。十六份車頭歸棟仔係用樹桁仔起个，屋樑同桁桷無用釘仔，全用古時鬥榫个工法，聽講係為著避邪祈福个設計。

回想在民國 87 年个時節，電視新聞忽然報導，十六份車頭愛停用㗎。佢同同事參詳過後，幾儕人都講愛煞煞去寮正好，係無另擺無機會坐火車去十六份車頭咧。故所尋一個拜六，佢兜在新竹車頭上車，約好坐幾多點个車枋、哪個車廂，佢在竹南站上車，復興號定仔確等上，佢兜心情又歡喜又傷悲。食晝過後，決心用腳尋古人个影跡，一路項謔謔、翕相、笑弛弛仔，行點過鐘總算看著龍騰斷橋。橋係用紅磚合花崗石起个盡古樸，告知關

刀山大地動，嘎同佢搥斷忒淨伸橋墩定定。該一支一支企等个橋墩，年視年還係孤栖个企等，等等佢心愛个火車來看佢。

日仔像火車過隆恁遽，佢過一擺來到十六份車頭，愛來尋二十零年前个美好。重新規畫過个車頭，錫來撈撈像蟻公恁多个遊客。佢等咧歸晝邊正補著位仔，拿著號碼坐三加一儕个位仔，面頭前係兩公婆，仰火燒豬頭——熟面熟面？煞煞同佢兜相借問、打嘴鼓，原來係頭份鄉親，開食朝个店，離吾屋下無幾遠，實在有緣。

鐵道電動自行車，慢速行駛舊山線，經過 2 號暗隆暗摸叮咚，聽著廣播聲紹介暗隆長度 726 公尺，會發出七彩電火，阿姆哀！金晶積亮²非常靚！途中群山美景現，行過 33 公尺高个魚藤坪鐵橋，底下係深深个河壩，坐在半天高个車廂看啊下，試著腳底撓撓。遠遠看龍騰斷橋北段古蹟，車仔停在南斷橋秘境，大家下去遶遶看看，煞猛翕相後正回轉。

「古人不見今時月，今月曾經照古人。」靚靚十六份車頭，承載鐵道百年照。這擺遶山花當暢，湛斗一日心情放，快樂出門異鬆爽。

¹ 十六份車頭：音 siib liug` fun ca` teu`；原稱「伯公坑信號場」，民國 47 年改稱「勝興火車站」。

² 金晶積亮：音 gim` jia` jid` lang；光耀明亮的樣子。

編號 10 號

【同阿姆共下食飯】何志明原作

頭擺阿姆當會煮食，炒肉炒到香醇醇仔，兩下半就煮好一桌菜。尤其係豬腸炒薑絲，係阿姆个手路菜，兜啊上桌，歸家人就相賽挾。舊曆過年該下，親朋好友來屋下食飯，阿姆歸桌个飯菜，準備到當豐沛，大家都食到肚臍臍仔。

吾屋下个飯桌，就像係酒席，偌同大哥、阿爸、阿姆、阿公、阿婆，一家人做得圍等圓桌食團圓飯，係一件當幸福个事。可惜，較好个桌席還係會散忒。阿公、阿婆同阿爸，既經都過身咧。大哥同偌乜分灶，徙到別位戴地，正伸阿姆一儕人歇老屋。

這幾年阿姆變到當老，身體虛弱，頭腦退化，過年个時節，無再過煮食辦桌。阿姆平常時自家一儕人食夜當簡單，去買自助餐來食，佢恬肅肅仔坐在廳下食飯傍電視，一餐食忒，雖然講有魚、有肉、有湯，毋過當孤栖。

後來阿姆來吾屋下，同偌共下歇。該日偌親身煮菜，剁鴨盤、煎牛排、炒芥蓮菜。出桌哩，碗筷撿撿啊，菜兜去飯桌頂，偌同阿姆共下食飯。阿姆食到一半，偌正發現，阿姆佢碗頂伸个鴨肉同芥蓮菜，全咬毋得落，該埕忒硬个牛排乜係食了一口就放

棄。

原來，煮來分阿姆食个飯菜愛較軟入兜仔。想起頭擺，阿婆同爌肉煲到當酪，阿公盡好食入軟个案粿仔，因為老人家牙齒搖搖，毋好食忒硬个東西。

過後，偌買菜揀揀擇擇，雞髀愛選肥卒卒仔个，放落鑊頭肚煲到酪酪。硬確確个青菜，像係包粟、蓮根，忒硬咧，較好食偌乜毋會買。偌輒常買山藥、蘿蔔仔，擺兜仔排骨煲湯，清甜又好食。

以前下班，偌總係同吾舖娘討論，食夜愛去哪位食；這下下班後，嘎遽遽轉屋下煮飯。偌先開冰箱，冰庫裡肚个魚仔還硬硬，愛拿出來退冰；青菜愛洗淨來。炒菜該下，同抽油煙機打開來，正毋會滅到煙咚咚仔。灶下个飯菜香散開來哩，一屋肚都香噴噴仔。

下班煮食，長透無閒到捩捩轉，就算當恹，毋過看著阿姆做得好好食飯，食到會尋尾，偌心肝肚異歡喜。阿姆定定仔食，食慢兜仔正好，畀安心食飯，安心老。

該日阿姆講，佢食淨粥傍豆枝就好哩。偌笑笑仔，毋講話。

115 年基隆市語文競賽臺灣客語朗讀文章社會組（四縣腔）

編號 11 號

【一世情緣】鍾宙蒔原作

世間有一種情緣像流在身頂个血樣仔，生生不息，仰仔就毋會謙忒。

有一日朝晨轉到屋下，阿姆既經在灶下捩捩轉，佢講：「該油蔥¹豬肉湯燉好咧，先食一碗落去正毋會發長薯仔；油蔥皮莫擢忒，拿去搽面！」「三斗糯破六升粘个番瓜飯在電鑊仔頂爛等咧！」佢呢呢哪哪²講這講該；佢坐等看佢迂迂轉，一下影著阿姆在該切烏木米同黃梨，佢順手拈兩埕黃梨食看啊會酸無？

旁脣盤碗頂還有切好个覆菜、蕨、兩三皮蒜頭、薑嫲、辣椒仔；佢想芋荷又嫩又青旨有絲，正愛動手，阿姆講：「走開哪，該會拖人！」一隻大鑊仔个油拋拋滾，焗菜在該汨來汨去當生趣；佢膏等油蔥个面旨有閒好洗忒，興嘟嘟仔打開另隻鑊蓋看煮麼个湯？原來係四神，歸粒仔胡椒个香實在還錫人哪！阿姆擎等鑊鏟在該炒青菜，一隻手擗吾屎拙：「還罇擺哪，走開啊去！」

無兩三下一桌擺到淦淦淦，有蒜頭炒蕨，齏齏个味緒同覆菜

盡合味；有古時味个黃梨薑絲炒木米，鹹酸甜異開胃；用酸醋燴到透心个芋荷定著又綿又香；一大盤花刺花刺个焗菜有芋仔籤、番薯籤同番豆恁多口味；一大鑊胡椒粒个四神湯點米酒，還有一盆頭番瓜飯……，佢胥咄咄仔望等恁多菜，口涎水汨汨汨³強強會流出來哩！阿姆講：「遽遽！遽遽去喊大家來食飯！今晡日看麼人又跌落飯甌下咧！」

忽然間天搖地動同佢搖醒，迷迷糊糊正知係地龍翻身，半夢半醒佢毋願跣床，一桌个飯菜佢全還旨有食著，阿姆煮到香噴噴仔，佢還看得著燒爌爌仔个煙；在夢中，阿姆圍等圍身裙煮菜放七緣插菽香个樣仔，嗒一下試鹹淡个樣仔，額頭頂个寒毛有汗流下來个樣仔，擎鑊鏟炒菜笑咪咪仔个樣仔，無閒泊杈煮到當暢个樣仔，一切都像在眼前恁實在又有溫度啊！係佢想阿姆？抑係阿姆想念佢？阿姆！你過到好無？佢日日食香著燒當暢快，無病無災盡樂暢；雖然天人永隔，你也愛過來安樂自在！

人生如夢夢如人生，無盡个情緣實在分人難捨難忘啊！

¹ 油蔥：音 iuˋ cungˊ；蘆薈。

² 呢呢哪哪：音 niˋ niˋ noˋ noˋ；自言自語；嘀嘀咕咕低聲說話的樣子。

³ 汨汨汨：音 ioˋ ioˋ io io；形容口水流不停的樣子。

【靜夜情懷】周昱原作

月光高高掛在天頂，暗夜輕手輕腳、恬恬仔來也。日時頭个鬧熱頓恬下來，毋過，田厝个蚬仔、天頂个夜鷹¹、街路巷个野狗，嘅在這恬靜个暗夜，吵到人睡毋落覺。

暗晡頭，分人有異無相同个感受，無日時頭个吵吵鬧鬧，做得分有兜个人放輕鬆好好休息，毋過，有兜个人嘅會感覺著孤栖。從細就歇在鄉下个厝，最毋好熱天時節个暗晡頭：翕熱个天時，熱到人歸圓身毋鬆爽，還有搞怪个蚊仔在吾耳公厝搞因人尋，吵到厝盡佇毋著；各種動物、蟲蚧个聲音，就像一個無訓練過个合唱團，毋單淨壞聽，還分人感覺著懊躁²。毋過，寒天个暗晡頭嘅係厝最好个時節：睡目前，泡一杯燒燒个牛乳淋落肚，歸圓身跔等燒暖起來，再躡入³賁賁、軟軟个被骨裡背，實在鬆爽。

寒天个暗晡頭眠在眠床頂，看等月光透過窗簾照入間房裡背，就像一支鎖匙，打開因在吾心肝肚最深个該隻箱仔，箱仔裡背因等个，係厝對阿公恁恁个思念。蚊仔、蟲蚧毋協調个合唱曲

共樣唱等，毋過，有月光个比陣⁴，嘅分厝對阿公个思念變到緊來緊醃。從細，阿公就最惜厝，佢渡厝、惜厝、照顧厝，分厝盡多快樂个童年、幸福个回憶，毋過，因為醫生个一句話：「若公得著失智症也，漸漸仔會記毋得你係麼人哦。」這種幸福同快樂嘅總概毋見忒也。該句話就像一支當利个箭，深深射入吾个心肝頭。阿公，你做毋得同厝添放忒哦，偲兜毋係有講好，等厝大也，愛帶你去環遊世界啊！毋過，阿公還係漸漸仔記毋得厝、記毋得厝兜之間个回憶、記毋得厝同佢講過个話……，過無幾久，佢就過身咧。

夜深也，動物、蟲蚧个聲說也恬靜下來也，單淨該深深个想念像海浪樣仔，一陣一陣對心頭最深个地方激上來，鼻公忍毋核一陣酸，目汁也浸透目珠。阿公，你好無？厝永遠毋會添放忒你對厝个好，還有偲兜靚靚个回憶。在恬靜个暗晡，有你在心肝肚同厝做伴，厝毋會感覺著孤栖……。

在暗昏燈微个間房裡背，厝掀開窗簾，對等月光、世間萬物講出吾心肝肚最深个思念。

¹ 夜鷹：音 ia in'；夜鷹，夜鷹屬的鳥類。

² 懊躁：音 au cau；心中悵鬱悔恨。

³ 躡入：音 liung' ngib；鑽入。

⁴ 比陣：音 be' ciin；作伴。